

345/2  
RUNYANKORE-RUKIGA  
Orupapura rwa Kabiri  
2024  
Eshaaha 2½



**UGANDA NATIONAL EXAMINATIONS BOARD**

**Uganda Certificate of Education**

**RUNYANKORE-RUKIGA**

**Orupapura rwa Kabiri**

Okushoma, Okufunza n'Ebyemicwe n'Emitwarize

**Eshaaha ibiri n'ekicweka**

**EBIRIKUKURATIRWA ABARIKUBUUZIBWA**

*Orupapura oru rucwiremu ebicweka bishatu; A, B na C.*

*Garukamu ebibuuzo bishatu byonka.*

*Ebicweka A na B biine kukorwa buri mwegi*

*Omu kicweka C, tooranamu ekibuuzo kimwe.*

*Handiika ebigarukwamu byawe byona aha rupapura orundi orwakuheebwa*

## EKICWEKA A OKUSHOMA

1. *Shoma ekitebyo ekyakuheebwa ogarukyemu ebibuuzo ebirikukurataho.*

### AK'OYEHINGIIRE KAKWIGUTSA

Warujerere akaba amanya ogw'okuhondeeza ny'omushana, abandi baaba bagiire kukora emirimo y'okubatunga. Omwabazyo ku gwabaire gukiika aza aha muryango gw'akaina ke, ebyeshongoro biza ahaiguru. Okaba ohurira agumize ati; jerere jerere! Abajerere bagyenzi be bakaba bamwakiira ebyeshongoro biteekyerana. Warujerere akaba agwejegyera nyomushana.

Okwehingira ebyokurya akabiikaho eby'okwija kurya bwanyima, Warujerere akaba atakwetaho. Akaba ayesiga okutunga ebinagirwe omu mbungo z'abandi.

Wankoroto we akaba agira oburyo, aguma naayehenenga, buriizooba ahiiga ebyokurya. Ebimwe akaba abihunika omu mbisho ye. Akaba naayetega ati; "Nyensya eifa ku ririba ryataahire nshangwe nyine omushako ogurinyiha omuri rwaranda. Embisho ya Wankoroto ku yaabaire eherize kwijura n'aha bunwa omushana gwayaka, ekyanda kyataaha ahabw'okushiisha ebyobuhangwa. Ekyakuratsireho, obukooko obwetwa Kanyaananga bwarya emikamba. Enzigye nazo zaacwekyereza ebihingwa ebindi eby'amababi. Ebihingwa n'ebinyaatsi byayoma byarimbuka. Ensi yaakarangatana. Eifa rwaranda ryabuga ekyanga kyona. Abaabaire baine ebihunikirwe omu bitara byabo, nari ebitindikirwe ahandi nibo baayesiimire.

Eifa ku ryataahire, Warujerere yaatandika kwekambiika omushumi yaatimbatimba omu mwegyeko gw'eka ye arikuronda aku araanagye omunda, kwonka kaaburamu. Bwanyima yaagira ati; "owaakuza owa Wankoroto." Byayenda ndabumushumbire. Ky'okufa mpemuka!

Warujerere yaagyenda naashotooka, enjara yaamuhotoire. Yaayeturira Wankoroto, yamwetondera ati; "Niinye munywani waawe Warujerere ou otuura noohurira naayeshongora nyekiro." Wankoroto amubuza ati; "Waareetwa ki owangye, kwotakira kwijayo? Orwari rwawe, mpaho ngu n'ebyeshongoro, nyowe kantarikubaasa kurwemera n'okurwehitsya haihi?"

Warujerere ati, "Naareetwa enjara, erikwenda kundenzya orugo. Niyo yamputa ngu nkwehongyere ntafa. Nyabura we ntambira, naakweshengyereza. Nimpamya ngu embisho yaawe eyijwire endyaga ei orikwija kuryaho eri ifa ryona kandi ekashaagaho."

Wankoroto akabanza yaamusyorera ati, "Mutaahi wangye, beitu shi okubura eky'okutamira omu ifa iwe togira kitara nk'abandi bashaija? Obu abandi baba nibatayo emikono n'ebigyere iwe oba orahi?"

Warujerere ati, "Embisho yangye enkuru ekaigara. Nkabura obwire bw'okwetimbira endiijo. N'eby'okuhunikamu tingira bwire bw'okubihiga. Nyomushana nsiiba ngwejegyeire. Ekingwejegyeza kityo omu ihangwe

n’ahabw’okugabwa ndaara ninjerajera, ninteera entogoro ekiro kyona okuhitsya omukasheeshe”.

Wankoroto akabinga Warujerere, yaataho n’okumuseetera ati, “Tuntumuka rwata, ondugire omu ka. Za kutungwa ebijengo n’entogoro ebi oraaramu.” Nk’oku bagira ngu, “Ofubire aiba nyina.” Abaana babiri ba Wankoroto, omwojo na munyaanya bagabwa nibakunda Warujerere ahabw’okujerera kwe, baasharamu kumwibira ebyokurya bwanyima ya ishebo kugyenda.

Wankoroto akaba naakira kutsiga abaana be aha mbisho ngu hatagira owaiba ebyokurya bye. Izooba eryo, ishebo ku yaateire naaza ei abashaija barirengyeza, nyamwojo agambira munyaanya ati, “Toirooko okagambira Warujerere akaija tukamuha ak’okurya taata atakagarukire?” atyo, nyamwishiki ataragaza, aho naaho amureeta Warujerere, bamwibira omwate gw’oburo omu mbisho, baagumeemeera otwizi, atyo Warujerere agurigata ahurira yaagarukwamu amaani.

Warujerere ati, “Ni mwebare baana bangye, ninkabazinire, jerere jerere” atyo amirw’ensi. Ku haahweireho akaanya kakye, Warujerere agaruka aine obwoki abuheereza abaana abo baatandika kunuriiriza. Atyo aza omu mbisho ayihamu ebyokurya byona ebi yaabaire naayenda, akira rwaranda egyo.

Obwoki ku bwahweire, nyamwishiki ati, “Taata naatumara!” Nyamwojo ati, “huumura.” Nyamwishiki ati, “Hariho ou tutashereka, ou tutareeba, kwonka oguma naatureeba obwire bwona. Oguma naamanya ebiteekateeka byona, naahurira n’ebi tugamba byona. Tihariho na kimwe eki asherekwa. Kandi ogwo atagira eki asherekwa aba Ruhanga, na mbwenu ebi twaba nituteekateeka, ebi twaba nitwetenga n’ebi twagamba, n’ebi twakora byona. We yaabimanya”.

### **Ebibuuzo:**

- (a) Shoboorora oburemeezi oburikuruga omu kubyama abandi nibakora, kurugiirira aha kitebyo eki.
- (b) Ekihandiiko eki nikihwera kita abantu b’omu disiturikiti yaawe kumaraho enjara rwaranda?
- (c) Ebikorwa ebiri omu kitebyo eki nibihwera bita omushomi waakyo kutuura gye omu bantu?
- (d) Yoreka oku enfumu “Ofubire aiba nyina” ei omuhandiiki akoreise omu kitebyo erikweyoreka omu bikorwa by’abaana beriigyenda.

## EKICWEKA B

### OKUFUNZA

2. *Shoma ekihandiiko ekyakuheebwa bwanyima ohandike omu bigambo ebitarikurenga makumi mukaaga (60) orikworeka ahabw'enki bakuru b'amashomero bashemereire kushagika emizaano omu mashomero gaabo kurugirira aha kihandiiko eki.*

Obwegyese bushemereire kuhwera omwegi kugira empinduka nungi omu miteekateekyere, omu micwe, omu nyikiriza kandi n'omu bi arikubaasa kukora. Gumwe aha mihanda y'okuhikiiriza ebi n'emizaano. Nambwenu niyo nshonga ahabw'enki ekitongore ekirikukurira eby'obwegyese n'emizaano omuri Uganda kirikuteeraho ebiro by'emizaano omu mashomero.

Abeegi b'amashomero nibeetaba omu mizaano bahayahayana kureeba omwegi oraasinge abandi, nk'oku kiri omu bigyezo. Amashomero nigahayahayana kuruga aha rurengo rwa disiturikiti kuhika aha rurengo rw'eihanga ryona kwenda kureeba eishomero eriraasinge agandi na bwanyima rikaheebwa ekikopo ky'okworeka obusinguzi.

Hariho emizaano mingi erikuzaanwa omu mashomero nk'omupiira gw'ebigyere, omupiira gw'engaro, okwiruka, okuguruka, okurekyera orubango, okurekyera ekibaare n'endiijo, nk'oburyo bw'abeegi kuruhuuka baaheza okwega okw'omu bibiina. Eki nikibahwera kuguma nibakunda okushoma okw'ebitabo, emitwe yaabo yaaba etaruhire.

Emizaano erikukira obwingi neezaanirwa omu tiimu kandi tiimu erikugira obwebembezi burungi neekira kusinga ezindi ahabw'okukwatanisa n'okukorera hamwe kw'abazaani baayo. Eky'okureeberaho n'omuzaano gw'omupiira oguzaanwa abantu ikumi n'omwe omu tiimu. Bamwe omu bazaani baayanga kukwatanisa n'abandi, nikyorobera tiimu endiijo kubasinga.

Emizaano yoona eine ebiragiro ebirikugitegyeka yaaba neezaanwa kandi buri muzaani ashemereire kubikuratira. Omuzaaani orikugira emicwe mibi omu kishaayi naabingwamu omushazi w'empaka z'omuzaano ogwo. Eki nikireetera tiimu ye yaasingwa. Mbwenu, omuzaaani weena ashemereire kugira emicwe mirungi kandi akakuratira ebiragiro by'omuzaano ogu arikuzaana.

Omu mizaano yoona, habamu owaasinga n'owaasingwa. Eki abazaani bashemereire kukimanya batakatandikire kuzaana kwenda kwerinda okuguubwa kubi n'endwano za bwanyima. Abarikusinga omu muzaano nibashemererwa kandi abarikusingwa bashemereire kugumisiriza n'okugira amatsiko ngu nibaija kusinga omu bwire oburikwija. Eki nikibahwera kukora n'amaani ogundi murundi kwenda ngu nabo basingye.

Amashomero agamwe tigarikwetaba mu mizaano n'obu Ekitongore ky'Ebyobwegyese kiraabe nikishaba amashomero goona kugiraho ebiro by'emizaano. Eki nikireetera abeegi omu mashomero ago baafeerwa akagisha k'okuyazyza eshagama n'okuhwera emibiri yaabo kuguma ehamire gye.

N'ekintu kirungi abeegyesa kuhiga abeegi boona omu mashomero kwejumbira omu mizaano ahabw'okuba nikibaasa kuhwera abeegi abarikukora gye omu mizaano kuheebwa omugisha gw'okushomera busha kandi bakeeyongyera kukuza entaranta zaabo. Eky'okureeberaho, omwiruki mukuru Kiprotich ou baingi turikwesiimisa omuri Uganda akatandika kwiruka akiri omu ishomero. Eki kikamuhwera kwetaba omu mpaka z'okwiruka ahu yaasingire abandi bairuki akaheebwa ebiconco n'esente nyamwingi.

## **EKICWEKA C**

### **EMICWE N'EMITWARIZE**

#### **Eki**

3. Abantu bamwe nibagyezaho kwenda ngu enjugano zirugyeho kandi obwe kitwire kiri kikuru omu Banyankore n'Abakiga. Orikwema aha micwe n'emitwarize y'Abanyankore n'Abakiga, handiika enteekateeka yaawe.

#### **Nari**

4. Okucondoza okukozirwe abarikukurira eby'emicwe n'emitwarize y'Abanyankore n'Abakiga nikworeka ngu eminyeeto mingi neeshanga oburemeezi bwingi omu bushwere ahabw'okutakuratira ebishemereire kukorwa omu mugyenzo gw'okuriima. Orikwema aha birikukorwa omu mugyenzo ogu, handiika orikushoboorora oku oburemeezi obu bwakubaasa kumarwaho omu bushwere.